

## AKTIVNOSTI ČLANICA OMLADINSKE MREŽE BIH



INSTITUT ZA RAZVOJ MLADIH KULT

Ul. 4. viteške brigade 34-36 BA, 71 210 Ilidža, Sarajevo

E-mail: [kult@mladi.org](mailto:kult@mladi.org)

Tel.: 033 778 778; fax: 033 778 779

Web: [www.mladi.org](http://www.mladi.org)

### U SARAJEVU OBILJEŽEN MEĐUNARODNI DAN MLADIH POD MOTOM „UKLJUČI SE!“

„Kad završim fakultet, želim biti poslodavac.“

„Iako nemam stan i posao, i ja želim biti tata/mama.“

„Ne živim u centru grada i želim se slobodno voziti busom i tramvajem.“

Ove poruke glasno su odjeknule danas iz centra Sarajeva. Uz podršku Populacijskog fonda Ujedinjenih naroda (UNFPA), Institut za razvoj mladih KULT je, skupa s mladima, obilježio ovogodišnji Međunarodni dan mladih pod motom „Uključi se!“.

U našoj zemlji 67,1% mladih je nezaposleno, 43% mladih misli da će njihov standard ostati isti ili se pogoršati u budućnosti, 85% mladih se informiše o seksualnom i reproduktivnom zdravlju putem televizije. Svaka šesta mlada osoba je zainteresovana za političko učešće u društvu, a 4 od 5 mladih želi napustiti Bosnu i Hercegovinu. Statistike su poražavajuće. Ipak, rješenja postoje, tvrde iz Instituta za razvoj mladih KULT.

„Problemi s kojima se suočavaju mladi u našoj zemlji su problemi s kojima se suočavaju i njihovi vršnjaci u regionu ali i u svijetu. Rješenja nisu nedostižna. U Federaciji BiH u procesu je izrada prve Strategije prema mladima FBiH koja će obuhvatiti probleme mladih u 7 različitih oblasti. Od zapošljavanja, obrazovanja, do sigurnosti mladih. Slična strategija kreira se i u Republici Srpskoj.

Donošenjem i realizacijom dokumenata Omladinske politike Republike Srpske 2016 – 2020 i Strategije prema mladima Federacije BiH 2016 – 2020 uz učešće svih relevantnih aktera čiji je cilj unapređenje djelovanja i razvoja mladih, te poboljšanje života i položaja mladih, daje se jasan odgovor na pitanja i izazove sa kojima se mladi susreću“ – istakla je Katarina Vučković iz Instituta za razvoj mladih KULT.



Strategija prema mladima u FBiH, prvi je strateški dokument koji će tretirati probleme mladih u Federaciji i koja bi trebala stupiti na snagu 2016. godine.

Simbolično, na Međunarodni dan mladih, aktivisti Instituta za razvoj mladih KULT, svoje su vršnjake upoznali sa predloženim rješenjima koja će obuhvatiti ova strategija te su ih pozvali na aktivno učešće u njihovoj izradi i provedbi.

## ✚ SARAJEVO POLUMARATON: HUMANITARNA AKCIJA „TRČITE SA CILJEM, PREMA CILJU!“

Sarajevo polumaraton, u saradnji sa Institutom za razvoj mladih KULT, ove godine imat će snažan humanitarni karakter. „*Trčite sa ciljem, prema cilju!*“ – moto je humanitarne akcije koja za cilj ima prikupljanje sredstava za podršku projektima mladih koje su odabrali u Institutu za razvoj mladih KULT – Školi prijateljstva i Obrazovno-razonodnom centru za mlade SPAJALICA.

20. septembra 2015. godine u 9 sati ujutro ispred BBI centra u Sarajevu, deveti put označit će se start Sarajevo polumaratona. Međunarodni je to događaj, koji organizuje Udruženje „Marathon“ Sarajevo, a koji je tokom devet godina izrastao u najmasovniji sportski događaj u BiH, u kojem je prošle godine učestvovalo više od 1200 trkača i trkačica iz 32 države.

Ta činjenica, tvrde iz Udruženja, Bosni i Hercegovini i njenom glavnom gradu, donosi višestruku korist. „*Izuzev ekonomske, ekološke i sportske dimenzije projekta posebno nam je važan humanitarni aspekt jer želimo unaprijediti društvo u kojem živimo. Trkači i sportisti generalno, poznati su kao izrazito dobri i solidarni ljudi*“ - ističe Erol Mujanović, direktor Udruženja „Marathon“ Sarajevo, koje će ove godine, u saradnji sa Institutom za razvoj mladih KULT, prikupljati sredstva za podršku odabranim projektima mladih. Sportisti ali i gosti ovog sportskog događaja, ove će godine moći podržati rad Obrazovno-razonodnog centra za mlade SPAJALICA i Školu prijateljstva.

„*Obrazovno-razonodni centar za mlade SPAJALICA jedan je od vodećih društveno odgovornih centara za mlade u zemlji, koji kroz razne aktivnosti, usmjerava i motivira mlade ljude. Pored SPAJALICE, prisutni će moći dobro djelo učiniti i za Školu prijateljstva koja okuplja djecu do četvrtog razreda osnovne škole, kojoj stručni tim pomaže u učenju, rješavanju problema ili socijalizaciji*“ – istakla je Abela Purivatra iz Instituta za razvoj mladih KULT.

**Svi polaznici se mogu registrovati putem web stranice [www.sarajevomarathon.ba](http://www.sarajevomarathon.ba).**

## ✚ POČINJE KREIRANJE STRATEGIJE PREMA MLADIMA U UNSKO-SANSKOM KANTONU

Pokrenut je postupak izrade Strategije prema mladima u Unsko-sanskom kantonu. Vlada Unsko-sanskog kantona zadužila je Ministarstvo obrazovanja, nauke, kulture i sporta da od kantonalnih ministarstava, javnih ustanova i javnih preduzeća zatraži imenovanje predstavnika/ca u Radnu grupu za izradu Strategije prema mladima USK u periodu od 2016-2020. godine.

Institut za razvoj mladih KULT imenovan je da, u saradnji sa Ministarstvom, pruži stručno-konsultativnu podršku u procesu izrade ove strategije.



Ovom zaključku Vlade USK prethodili su sastanci koje je Jasmin Bešić, izvršni direktor Instituta za razvoj mladih KULT, održao sa gosp. Izudinom Saračevićem, premijerom USK, te gosp. Damirom Hodžićem, predsjedavajućim Komisije za obrazovanje, nauku, kulturu, sport i mlade pri Skupštini USK i gosp. Kenanom Keserovićem, dopredsjedavajućim Komisije. Inicijativu za donošenje Strategije pokrenuo je gosp. Kenan Keserović, zastupnik u Skupštini USK.

Strategija, koja je i zakonska obaveza u svim kantonima FBiH, a čije su donošenje zagovarali i predstavnici Vijeća mladih USK, trebala bi precizirati jasne ciljeve i mjere brige vlasti o mladim ljudima.

## ✚ STEČENI UVJETI ZA FORMIRANJE VIJEĆA MLADIH FBIH: U GRUDAMA ODRŽANA OSNIVAČKA SKUPŠTINA VIJEĆA MLADIH ZAPADNOHERCEGOVAČKE ŽUPANIJE

U Grudama je održana osnivačka Skupština Vijeća mladih Zapadnohercegovačke Županije. Ovo vijeće čine tri lokalna vijeća mladih - općina Grude i Posušje, te grada Širokog Brijega.

Za predsjednika Vijeća mladih Zapadnohercegovačke Županije izabran je Mate Lončar iz Posušja, a dopredsjednik je postao Josip Zelenika iz Širokog Brijega. Za predsjednika Skupštine izabran je Martin Kondža (Grude), a za njegovog zamjenika David Naletilić (Široki Brijeg). Za tajnicu je izabrana Josipa Zorić iz Gruda. Mate Lončar, predsjednik Vijeća mladih Zapadnohercegovačke Županije, istakao je da mladi Zapadne Hercegovine zaslužuju da imaju iste mogućnosti kao i ostali u Bosni i Hercegovini.

„Udružili smo snage, radit ćemo onoliko koliko možemo, radit ćemo u skladu s našim mogućnostima i siguran sam da naš trud neće biti uzaludan“ – dodao je Lončar. Osnivačkoj Skupštini prisustvovala je i gđa Ružica Mikulić, ministrica obrazovanja, znanosti, kulture i sporta ZHK, koja je istakla da na mladima svijet ostaje i da trud ovih mladih ljudi da se izbore za sebe sigurno neće ostati nezapažen.

U ime domaćina, općine Grude, obratio se službenik za mlade Općine Srećko Mikulić, koji je poželio sreću i uspjeh u radu Vijeću mladih. Formiranjem Vijeća mladih Zapadnohercegovačke Županije, koje je šesto kantonalno vijeće u Federaciji BiH stekli su se uslovi za formiranje krovnog vijeća, Vijeća mladih Federacije Bosne i Hercegovine.



Osnivačkoj Skupštini prisustvovali su i predstavnici/e Instituta za razvoj mladih KULT BIH.

## ✚ NOVAC OD HUMANITARNE IZLOŽBE, MALIŠANI IZ ŠKOLE PRIJATELJSTVA URUČILI DJEČJEM DOMU BJELAVE



Prva humanitarna akcija u kojoj su učestvovali mališani iz Škole prijateljstva prošla je itekako uspješno. Nakon što su prodali skoro sve crteže na humanitarnoj izložbi u SPAJALICI, mališani su skupili novac i donirali ga Dječjem domu Bjelave. Sredstva će biti utrošena za opremanje jedne djevojčice za novu školsku godinu. Mališani su, pored prikupljenih novčanih sredstava, svojim vršnjacima uručili i poklone u vidu igračaka i odjeće.

Prva humanitarna izložba polaznika Škole prijateljstva održana je ispred Obrazovno-raznodnog centra za mlade SPAJALICA i bila je, slažu se mališani i njihovi roditelji, jako uspješna.